

四庫全書

集部

欽定四庫全書

石倉歷代詩選卷三百二十一上

明 曹學佺 編

明詩初集四十一上

黃淮

采蓮曲

采蓮休采菱菱刺多傷手
留取玉纖嬌為郎綰佩玢食
蓮去蓮心心苦難適口
誰知苦心中能使根莖秀去年

蓮始衰今年花滿池妾貌宜不宜妾心長自持

擬古

寶劍埋豐城爛斑土花碧飛精上燭天紅光千萬尺森
然叢棘中一朝遇卓識出匣解飛騰神變良巨測借問
以何如物理有恒則

雷賓啟東作品彙咸昭蘇寒谷有冰條萌蘖何當敷所
處第既偏造化功自殊回也陋巷士傳說版築徒窮達
安所遇名與天壤俱

涼飈振林薄淅淅吹我裳素顏日凋謝緇鬢颯以霜褰
衣步前除沉憂迫中腸飢鷹翻辟韞老馬悲道傍逝矣
支遁叟懷哉田子方

冶銅鑄明鏡棄置生埃塵驅車陟遠道顛覆摧雙輪鏡
塵尚可拭輪摧尚可易逝水日東流潁陽向西夕懷哉
起遐心彈我牀頭琴

雜詩

房宿孕神駒飛騰出西極紫電掣寒雲汗溝赫流赤歷

塊塹一蹶窮年困與樵莖秣不充飢逸氣那能抑瑤池
春水波清渭烟草碧顧影舊長鳴浩蕩惟所適

又

蒿蓬相因依飄飄逐風起風力有時息零落在泥滓蘭
蕙幽且清揚輝被芳沚白露凝為霜華葉亦披靡蒿蓬
何足歎慨此蕙與蘭蘭衰有餘馥猶足奉君歡

又

事夫移所天結髮願終老朝花未改容零落同秋草涕

酒沾衣中沉思怒如擣妾有明月珠朝夕置懷抱慮恐
生埃塵拂拭常自保安得懸君軒照君即遠道

雜咏

汎汎湖中水盈盈水上蘋霖雨激顏波驚風蕩其根華
葉半摧靡猶能播清芬惜哉無輕舟采掇及芳辰可以
供祀事可以薦嘉賓堇荼美如飴蠲潔非所珍

其二

孤竹鮑回風偃仆困泥潦屈節交枝柯虛心長自好美

人隔河洲河水漫浩浩褰裳不能涉顧望傷懷抱卉物
雖甚微生意非草草煦嫗待春陽翹然起枯槁

懷知己

蒲葦滿方澤林霏凝夕陰中有孤飛鴻嗷嗷吐哀音隨
風入人耳悽愴傷我心矻矻窮旦暮離思誰能任自非
乏儔侶勢異升與沉清論久不接何由豁塵襟寄言暇
豫者勿疑朋盍簪

園扉燕

烏衣翩翩刷毛羽年年愛逐東風起結巢偏向王謝家
錦雲作隊烟花裏翠幙凝春睡正酣梁間交語何喃喃
曉起多應厭喧聒當軒不肯收朱簾往來無計入華屋
誤向園扉尋止宿園扉塵吟風日淒相呼相顧驚且疑
經營何處嘶香泥不入愁門傳世俗愁人便欲從爾卜
無端浪蝶與狂蜂也向簷前弄晚風

牆外柳

牆外誰家春滿林綠楊萬縷搖晴陰風花散亂自來去

作意攪亂愁人心豈不見灞陵橋東二三月好枝早被
行人折又不見吳隄草荒秋露涼柘條空抱蟬聲咽愁
人愁劇心不移年年長與東風期

柳絲長

柳絲長搖春愁春愁萬縷多如織容華銷鑠應難留江
南春正好東風弄和柔紛紛綺羅子往來陌上頭柳絲
綰作同心結迴嚙索笑爭嬌羞誰知同心亦易解盤旋
百結空綢繆離亭二三月行人送離別驪駒曲未終柔

絲已先折行人一去歸不歸執手相看那忍訣縱使柳
絲千萬丈折來難繫愁腸絕我與韶華情更慳十年頓
足園扉間時向牆頭看柳色有手欲折何由攀一心願
作雙飛燕還作春風舊庭院飛飛不離柳絲旁却笑離
人空斷腸

立秋

久困炎蒸苦忻聞報早秋斗杓方右指大火已西流班
扇行當棄南冠尚未投有懷如宋玉搔首不勝愁

秋熱

入秋旬日後餘熱尚憑陵病體何時減愁懷此日增渴
思金碗薦清愛玉壺冰便欲凌風去羈留愧未能

丙申初度日承諸知己設酒殽相慰詩以謝之
忽忽逢初度南冠慄別魂親庭勞遠望客計向誰論力
疾裁詩句攢眉對酒樽何時恩詔下春意滿乾坤

除夕

羲馭無停策流光日夜催
膈隨寒漏盡春逐曉鐘來
爆

竹傳餘響屠蘇憶舊醅
相看不成寐寂寞擁寒灰

回南京經古城

祠廟臨江渚人家雜棗林
霜輕冬尚煖水濶晝多陰
客路驚衰鬢歸舟愜素心
從今各努力那使別愁侵

暮春

淑氣屆清和春遊興已過
草晴香霧合花盡綠陰多
事業孤衷在年華兩鬢
幡還期解羈紲紫陌笑聯珂

雨後聞蛙聲擬賦詩壇一律

形勢依山澤詩壇屢效奇池蛙喧鼓吹園茗展槍旗花
底蜂衙集槐陰蟻陳移有時酣自戰不許寸兵持

乙未暮秋述懷呈諸同志

忽忽流光九月初南冠又是一年餘冥鴻何事罹魚網
羸馬猶存駕鼓車砧杵淒涼寒信早風霜搖落柳條疎
不緣知己能相慰對景能無嘆索居

夜夢二親

雙親鬢髮久成絲千里關河入夢思愛日瞻雲情罔極

下機投杼事堪悲
風回過雁鄉書斷
月滿園扉夜漏遲
臣子立身忠與孝
不才深愧負明時

憶院中竹

一別詞垣數月餘
娟娟修竹近何如
夢魂還憶林間醉
詩句誰能節下書
翠色凝烟春院寂
清陰籠月夜窗虛
邇來渴想平安報
鴻雁無情音信疎

丙申正旦

青陽肇序際亨期
民物熙然仰德輝
豈謂淳于猶繫獄

應憐伯玉已知非九重天闕瞻思切萬里親庭定省違
忠孝兩情何日遂鏡中殊覺二毛稀

詠雪

憑夷剪水作冰花幻出人間富貴家簷溜凝寒珠錯落
庭柯壓翠玉交加梁園賦就歡何劇剡曲舟回興可誇
安得登樓窮望眼乾坤一色瑩無瑕

早過直沽

孤城近海曉光遲遙認歸程望不迷潮水分流船上下

人家相對岸東西市聲喧襍商人集野色荒涼雁影低
猶記前年留飲處菊花盈帽賦新題

秋暮書懷

極目關山幾夕陽況逢秋暮轉淒涼愁思竹葉浮鸚鵡
寒齋蘆花當鸛鵒報主志存龜左顧思親心逐雁南翔
折筵擬卜餘生事只恐靈氛也斷腸

和友人九日感舊詩

謫仙胸次清無邊尋常賦詩如湧泉葛巾自漉槽下酒

綸竿晴釣槎頭鰓江楓染霜錦為幄塞雁書空雲作箋
客中對景良自慰何用感昔悲暮年

己亥人日

纔入新春晝漏長熙然萬象媚春陽俗傳七日為人日
身在他鄉憶故鄉風色漸催花信至柳條輕浥雨痕香
憑誰挽却甌江水散作流波洗別腸

辛丑九日

幾年重九愁中過不似今年思轉愁南浦雲迷鴻雁字

故園霜冷菊花秋
綸音已喜覃恩澤
涸鮒誰憐久滯留
破帽不禁風色緊
却嫌蓬鬢日飈飈

自悼

生來志氣薄雲浮
七尺微軀不自謀
抱戚噬臍應已晚
沉酣濡首亦堪羞
花間朝露晞春日
霜後陵苔怯素秋
老眼怕垂楊子淚
且須含笑看吳鉤

追和東里詩韻一絕

與子別來久相思
日幾回有時成邂逅
多是夢中來

問菊

試問故園菊今年竟若何想經秋雨後零落舊枝柯

重九前一日同儕者舉唐人況復明朝是歲除

之句要余倣此賦之

夢回孤枕夜更長月轉西樓雁唳霜冷落不禁情思苦
明朝況復是重陽

秋夜

掣鈴擊柝聲相亂擁被披衣夢未成月色相親如有意

夜深猶向隙中明

丙申南還舟發通州

官舸乘風五兩輕
寒流泊岸浪花生
張家灣上頻回首
記取南還第一程

暮春

孤館淒涼客思淹
忽聞春暮半開簾
東風綠遍堦前草
何事偏教鬢雪添

見花

乞得花枝洒淚看
滿懷愁緒萬千端
故園亦自開桃李
門掩東風細雨寒

石倉歷代詩選卷三百二十一上

欽定四庫全書

石倉歷代詩選卷三百二十一

明 曹學佺 編

明詩初集四十一

程本立

惜日短 歲十二月二日同諸友訪環中老人於

西溪隱居遂命題各賦一篇

我志在千古此生無百年百年亦苦短白日如奔川光

陰旦復旦把鏡心茫然歷看古賢傑勲業照簡編安能不努力坐待雪盈顛義和駕大龍為我遲遲鞭

春宴分韻得塘字

夜雨不濕泥曉雲低度墻嚶嚶鳥求友我情曷能忘蔡氏雅敬客羣賢集中堂及茲春節宴所欣在餘芳長吟何紆徐短歌或慨慷從來文字交豈徒弄杯觴華風蕩碧草綠水汎迴塘嗟哉詠歸樂孰與曾點狂

雪佛碑

天花陰墜空平地忽三尺異哉西方神現此水精域胎
非託摩耶意叵勞刻畫乃瞻白玉相安用黃金飾一洗
熱惱心悉依清淨力紅日起扶桑終焉化無跡其無本
非空其有亦非色君看東逝波滄海不可測我來鳳凰
溪古寺久荆棘摩挲雪佛碑碑斷字莫識金石亦已壞
況非金石質萬事等幻影感之三歎息

贈商潛戴珪

釣澤可物色力田亦名科疇云山林士不為漢網羅有

客善沈晦古鏡垢弗磨行貨區囊中遠遊笑且歌驅車
太行坂捩柁楊子渦雪濤接溟滓空翠亘嵯峨險途亦
良苦勝覽不既多治生各有術藏器心靡他人疑望市
利爾自樂天和得酤百錢酒輒使兩頰酡乾坤一睥睨
萬物如爾何我昔岩壑居幽期結雲蘿今悲白黑染豈
幸青紫拖夷門宮舍冷愧爾頻來過將詩勿浪傳為我
自吟哦

發鄭州

駕轅指嵩洛發軔涉京須兩厓忽剗剗一徑中縈紆
惟命低褰雨雪恐霑濡端居豈不樂顧乃興嘆吁僕夫
盡徒跣軌轍多泥塗仁者念同胞飢寒切吾軀行行敢
中止戒之以徐驅

過黑石渡

邛山障黃河洛水崩黑石方舟載車馬煙雨行人立我
昔將王命北渡祠河伯茲來復輶傳觀者笑曾識聖君
禹功齊神龜當復出

出洛陽城

輓輶上天津伊闕當我前連峰左右起奔走相後先古
來五嶽內嵩高極中天儀刑正四表襟帶流三川河山
固王室豈直金城堅漢業此中興周都竟東遷壯遊快
一覽遺跡悲千年頽垣舊誰築野蔓栖朝煙

齋宿皇陵夜起俟王駕

濟濟肅冠佩隱隱聆和鸞彤庭烟斜月松栢颯以寒神
山衛皇陵左右龍虎蟠孝思穆宸衷王心豈遑安秋嘗

日維吉夙駕夜未闌駿奔執籩豆臣亦備祠官所職在
誠恪匪曰盛容觀斯言告在列同心臭如蘭

中都早行

雞鳴登前途白日未出海堦傍坐之久搏桑發光彩安
知雲霧起倏忽陰晴改我行正愁雨亟去復奚待此意
難重陳無由訴真宰

過池河驛

蕭蕭牧鳴馬轉轉輓征車人生各有役我何念安居東

岡上初日霧暗未光舒依依見亭堦暖暖經村墟我足
日以跂我僕日以痛自非得神仙豈免勞形軀

惠雲塔

老禪西來兜率宮金曇舍利開芙蓉平地起作寶光相
七級上凌天九重摩尼頂珠現穹碧丹霞掩映雞足峰
八牕玲瓏懸皎月層欄翠滑扶神龍我欲乘虛求帝釋
雲梯高峻紅塵隔簷鈴停語寂籟冷白鶴飛下蒼煙夕

題竹石小畫

玉堂仙人松雪公寫竹正似石室翁雲林道人雖後出
往往落筆生秋風吳人好書仍好畫百年遺墨千金價
比來何處得此圖松雪雲林此其亞娟娟嫩玉纔數莖
煙梢雨葉縱復橫洞庭寒骨沈水底鐵索下取蛟龍爭
却憶江南舊池館筆牀棋局何蕭散一行作吏事便廢
十年不歸夢欲斷松雪子孫今幾人雲林弟子誰逼真
得歸故鄉倘相覓竹枝掛我頭上巾

楊花曲次友人韻

君不見陳宮美人張麗華春情輕薄似楊花兵塵吹入
景陽井荒城老樹啼寒鴉又不見隋堤一千三百里煬
帝龍船壓春水錦帆飛不到天涯腥風戰血楊花裏噫
噓唏陳與隋山川雖是國已非年年三月楊花飛江南
江北啼子規

合州

合州樓前江水合州樓外青山匝倚樓西望雨溟溟
順水舟來飛兩楫閬川山水天下稀不如合州可忘歸

街頭彷彿吳門市人家瓦屋白板扉買魚沽酒醉今夕
相逢誰是吳門客雞鳴風雨夢初醒隣機軋軋村舂急

銅梁縣

銅梁縣庭公事少銅梁縣市官橋小上山下山石作街
街南街北人家好人家好農不好商婚男嫁女不出鄉
香芹煮羹飯有稻木綿紡絲衣有裳陳郎邀我青樽滿
情多已覺迴鞭懶酒酣欲寫銅梁歌百錢買筆紫羅管

浴鳳沼

鳳鳥從何來來止桐溪傍錦毛濯春雨綵翮晞朝陽蘋
藻動浮彩蘭芷吹幽香鳳去今不返空餘鷗鷺行

桐溪

梧桐蔭清溪溪水波粼粼上有五色鳥下有黃金鱗秋
雨洗白石春風生綠蘋願學羊裘子時來垂釣緜

橫湖

橫湖如匹練風景此中稀日暖赤鱗躍天晴白鳥飛寒
松蟠石岸春水沒苔磯幾度斜陽晚漁舟渡口歸

東山

陟彼東土山惘然思謝安
草露濕我衣海日升岩巒愧
無如花妓醉舞追前歡
飄飄谷風來吹墮頭上冠

題李典儀雲東卷

母老今猶健兒行久不歸
一官淹白首萬里夢斑衣
越郡東溟濶秦關西日微
只將雙淚眼日日看雲飛

許州東屯雜詩

東屯歸欲晚西澗立多時
病眼青山怪幽情白鳥知
十

年無舊業九日有新詩採得籬根菊馨香好遺誰

其二

丘園莽蕭瑟客子暮徘徊山是釣州起河從鄭邑來衣冠餘古墓歌舞只荒臺野哭誰家婦秋聲助爾哀

其三

徑捷車行少溪深馬渡遲地臨長社邑民指太丘祠所歷多懷古余生豈好詩據鞍欲吟嘯風雨忽淒其

季子奉祠浚井得奇石三輟一以贈長史張均

倡和有作次韻

偶從深井得元是太湖來艮嶽無仙仗昆明有劫灰忠
臣厲齒泣征婦望夫回不勝懷古意點筆賦崔嵬

過呈貢縣

馬頭呀海口鼇背竚雲根雁塔城南寺漁家水北村天
朝無外國地氣近中原願易伽宗部居官長子孫

晚至晉寧州

落日孤城小輕烟一水斜青山蒙氏嶮綠樹焚人家絕

塞無來雁荒城有噪鴉多情此州尹勸酒說京華

觀梅分韻得枝字

只道花如雪如何鬢亦絲客中今日臘眼底去年枝地
暖春歸早江寒月出遲詩情似何遜惆悵立多時

送景德輝教授歸越中

斗酒都門別孤帆水驛飛青雲諸老盡白髮幾人歸風
雨魚羹飯烟霞鶴氅衣溪山無限意予亦夢柴扉

又得永字

秋風絡緯啼金井
月色樓臺漏聲靜
美人遠在天一方
何以慰我心耿耿
玉關不夜嫦娥老
銀漢欲冰河鼓冷
強把相思托鳳簫
小階吹轉梧桐影

京索道中

路從京索上坡陀
于此勞人感慨多
徒割鴻溝分楚漢
終歸龍準一山河
大風沛邑臺中筑
半夜虞姬帳底歌
千載興亡俱寂寞
羣山起伏自嵯峨

為黃伯昂題君山別業畫卷

畫圖林壑起雲烟使者高懷寄靜便背郭真成浣花屋
看山如坐洞庭船柴門黃葉鄰僧掃石徑蒼苔野鹿眠
如此故巢勞遠憶只應頭白是歸年

栢峰為希仙道士作

何處仙家紫翠房一峯烟雨栢蒼蒼羊眠白石雲根爛
麝過青苔雨氣香羽節凌風天入籟綵囊乘露玉為漿
頭顱我已將華髮便欲傳君却老方

乳石詩并序

象賢奉常得異石于演樂堂典寶周翁識之云道
州乳石也奉常欣然以詩見遺余嘗怪李翰林集
有云荊州玉泉山多乳窟中有白蝙蝠飲乳水而長
生其大如鴉典寶荆湘人欲一問之未暇也今以道
州乳石言之則荊州乳窟可知矣然又聞王烈入
山得石髓青泥流出隨手堅凝氣味如秬飯按仙經
云服之壽齊天地竊謂髓之與乳皆石之脂也髓其
凝者乳其液者乎服髓者壽則蝙蝠飲乳而不死亦

無足怪矣獨未知邈世長往之徒亦有服乳而長生者乎因賦詩答奉常并呈長史公且欲質諸典寶翁也
聞道山中乳窟多乳泉流出石為窠洞門到夜飛蝙蝠
驛路何年載橐駝野色忽看新崕嶮水痕猶認舊漩渦
豈無青髓香如飯老我黃塵奈爾何

寄題嚴氏蒼雲樓

嚴氏子陵後也今居上虞山中樓名蓋取范文正
公雲山蒼蒼之句云

嚴陵灘下水潺潺千載高名宇宙間
風節最稱東漢士子孫猶隱上虞山
滄江烟雨羣鷗沒落日雲霄一鳥還
好倚樓居同極目久淹官署獨何顏

送洧川呂主簿被薦赴京師

儒生有策致時康送子城南別意長
四十脫身辭簿尉九重虛已問賢良
輿枉往往農功後桑柘陰陰官路傍
洧上曾過見佳政于今父老不能忘

次韻貝原翬留別

原翬鄉先生貝廷珍仲子也兄弟五人三人出仕
兄原憲都府經歷弟季翔楚府紀善而原翬今宰
武安邑以考滿赴京師相見于大梁因賦詩留別
客裏逢君說故鄉留連樽酒過斜陽漢時循吏稱三異
馬氏佳兒識五常老去只驚搔髻短醉來那覺放歌長
明朝相送城南路記取槐陰四月涼

其二

五年官舍汴州城一見鄉人倍愴情
賴有寒氈留客坐

可無春釀與君傾
北來山水登臨倦
南去音書感慨并
何日吳松江上住
兩策烟雨約舟橫

過五河縣

龍窩驛近鼓聲催
轉舵傾帆沙岸隈
共指深淵最空洞
豈無神物待雲雷
風晴楊柳如看畫
水綠蒲萄始發醅
浩蕩好逢春色裏
詩成南雁忽飛回

鳳陽東關

東關發船烟霞開
城郭山川何壯哉
長淮千里出桐栢

慶雲五色近蓬萊
漢廷書生有賈董
梁園詞客皆鄒枚
自嘆無才日樗散
金門退食尚遲迴

高郵夜泊

城樓月色見觚稜
城下官河夜欲冰
返照疎林皆野燒
殘星別浦是船燈
腐儒食祿曾無補
倦客思家已不勝
春雨五湖烟水濶
荷蓑歸去下魚罾

和張德麟紀善初度韻

東風驛騎始南還
晚興留人食尚寒
秦華黃河觀未了

陽春白雪和皆難
山香舞處花如雨
海月飛來玉作盤
但願此身俱老健
年年此日共清歡

送王幼度待制致仕歸大梁應教

簪筆三年直禁坡
揚舲一日上淮河
歸來疏傳黃金重
老去申生白髮多
野陌早花纔點綴
官亭新柳已婆娑
梁園到日春如海
兒子將軍奈樂何

贈莊浪王鎮撫

左陳書史右弓刀
誰道邊城軍務勞
萬馬秋風肥苜蓿

一鵝春水醉蒲萄山山部落西戎靜夜夜旌旗北斗高
正是太平無事日不妨詩態憶吾曹

入益門

蜀關秦嶺路初分疊嶂層崖日易曛飛棧下臨千尺礮
行人上惹半山雲高堂煙霧曾貪畫險道風湍却厭聞
萬里敢辭筋力盡捐軀未足報吾君

嵩盟九日次井泉百戶韻

天涯九日一登樓應是黃花笑白頭脫帽不妨同醉倒

拂衣安得便歸休山盤晴谷深藏寺水縮寒溪淺露洲
上馬荒城向昏黑休教鼓角起邊愁

送魚課司使霍思誠赴京師

三年官守滯蠻荒萬里羈魂度太行居有馬羈留客坐
食無魚鮓寄親嘗晴天梅樹常含霧臘月山花不受霜
辭滿得歸人共樂將詩送別意茫茫

題滇陽小景送雲南通守朱紹祖考滿赴京師
城南城北作春遊父老逢人說郡侯田野只今無外事

衣冠何地不中州馬頭紅雨花將盡海子白雲山欲浮
昨日新知今日別可堪東望獨憑樓

滇陽二月罌粟花盛開皆千葉紅者紫者白者
微紅者半紅者傳粉而紅者白膚而絳唇者
丹衣而素純者殷如染茜者一種而具數色
絕艷麗春譜之所云

鄩聞東風不作寒米囊花似夢中看珊瑚舊是王孫玦
瑪瑙猶疑內府盤嘶過驊騮金匝飛來蛺蝶玉闌干

瘴烟窟裏身今老春事傷心思萬端

昆明池

昆明海水不成潮一鏡涵空山影搖明月碧鷄飛夜夜
白雲蒼狗變朝朝登臨未必南荒惡瞻戀其如北極遙
汀草汀花自春色無人同放木蘭橈

晚至安寧

連然驛路馬曾諳落日行人思不堪地極九州銅柱北
山蟠六詔鐵橋南湯池水底皆陰火鹽井烟中半夕嵐

迴首蓬萊天萬里忍教塵髻白髭髭

自姚安出普湖

層關飛鞚出寒雲萬木歸鴉亂夕曛山自靖蛉川口合
路從鸚鵡嶺西分道傍築室新成市塞上屯田久駐軍
遠客誰無鄉土念悲笳吹動不堪聞

過小雲南

眼明百里眺晴川洗我悲辛一迥然山氣成雲無五色
石光如鏡有千年荷戈戍士終懷土賣劍居民盡力田

自古華夷歸混一今人未必重開邊

過趙州

青山環抱水爭流行盡雲州入趙州四野耕耘多樂歲
諸蕃出候不防秋過橋花竹前村近入谷松蘿小寺幽
妻子誰能免相憶他鄉雖好莫淹留

鄧州驛

平岡走馬神摩洞荒驛聞雞鄧睽川丹壑洩雲朝翳日
玉泉陰火夜生烟一年殘歷愁來簡萬里新詩老去編

山水不殊人事異中原歸計正茫然

鶴慶驛會吳人馮廣文閩人林稅使

馬啼蹴徧陰厓雪直向居庸塞外行
日落忽聞牛背笛川平始見鶴州城
秋風千里萼絲滑暑雨三山荔子生
遷客相逢話鄉土天涯何限未歸情

陪臨安府官僚遊龍潭

臨安山水似江南天氣況當三月三
往往揮毫逢鶴埜行行騎馬過龍潭
載歌白雪誰能和試飲清泉亦不貪

記取人家畫欄曲桃花一樹倚春酣

登雲南城樓

漢武開邊事可稽滇池遠在夜郎西已聞郊廟歌朱雁
復道山川蘸碧鷄王業無如今日盛才名孰與古人齊
自慚作賦非司馬萬里登高意欲迷

題三餘齋卷送錢椽還鄉

白門送客日已斜車馬塞路風吹沙金印何須大如斗
錦城不如早還家雨夜空庭惟木葉雪晴深谷有梅花

三餘齋中自足樂閉戶讀書雙髻華

送教授致仕歸金華

六十看山眼未昏草堂歸去卧烟村朝廷已許乞骸骨
衣食未須憂子孫上馬天風吹蓆帽落帆江月到柴門
美芹炙背區區意他日難忘獻至尊

送終南道士還山

脫履都門骨已仙山中故物尚依然寒牕火伏燒丹竈
暖谷烟生種玉田一馬看來齊萬物雙龍化去歷千年

長生久視寧無訣安得從師老洞天

題畫

瀑雪青天落松濤白日飛罷琴成獨賞得趣在忘機

舟中雜興

蔡河百折到沙河沙河入淮風浪多使者官船夜須發
奈爾長淮風浪何

又

十日舟行不見山沙河多似蔡河灣舟人忽報安豐近

指點數峯烟雨間

題山水釣漁小畫

人間萬事一絲輕
江上數峯雙眼明
老我不歸空看畫
秋風又到洛陽城

題梨花錦鳩圖

萬花深處語黃鸝
花底能無挾彈兒
自在兩鳩春寂寂
一枝晴雪立多時

題畫送人歸越中

十年歸夢落滄波一日飛帆渡浙河
指點南山最青處故巢依舊白雲多

楊州四絕

遠水疎星影動搖西風落木景蕭條
傷心一片船頭月猶照揚州廿四橋

題子昂烟波歸興圖

此生只合住湖州罷得微官任白頭
盡買太湖三萬頃烟波隨處着漁舟

過澠池問路于一叟指邑西土丘曰路從此去
此地罷兵臺昔秦趙會盟處也詩以識之

青山四顧似環滁千載荒城百戰餘問路罷兵臺下去
邑人能說藺相如

華陰駐馬橋

絕谷層關路屈盤斜岡側嶂石巒岼今朝駐馬橋頭立
華嶽三峯正面看

滇陽病起

天涯病後命如絲，豈復形容似舊時？
有客相辭汴州去，傳聞正恐到吾兒。

題山水小畫

太湖三萬六千頃，七十二峯湖上山。
草閣酒醒風雨過，棹歌聲在水雲間。

題浦人畫梧桐竹石

錦石成山花滿川，子孫一旦鬻平原。
疎篁古樹蒼厓雪，茆屋看來已百年。

石倉歷代詩選卷三百二十一下

欽定四庫全書

石倉歷代詩選卷三百二十二

明 曹學佺 編

明詩初集四十二

韓守益

過長風沙

長風沙風高沙濶天無涯
紅雲畫舫搖雙櫓官遊幾見
蘆花飛蘆花飛映晴雪身世飄零不須說
四海皆兄弟

無端對面分秦越丈夫莫學冷煖情襟懷磊落肝膽明
明朝去作朱幡守萬樹巴山隔帝京回首長風沙外程

桃源圖

閨秦呂政吞六國虎視咸陽威赫赫百尺瓜坑書燄紅
黔首欲愚愚不得長城之役驪山徒逋逃首鼠何地無
携家竟入武陵去一區山水如蓬壺就中寒暑無正朔
剩種桃花記開落炎風吹散鮑魚腥馬後之牛相繼作
家人父子何優游男耕女織無離憂空聞太古葛天民

只隔潺湲一水流
漁郎忽作花間夢
一日千年綠霞洞
清樽美酒醉復醒
扶老携童走相送
扶桑光射明朝陽
瑤草露重涵幽香
起來恍惚夢始覺
歸舟一棹春溪長
時驚俗駭追踪跡
翠老紅飄煙幕幕
仙耶凡耶總莫知
萬古高山倚空碧

過九江

夷險休渝節
勤勞莫問家
暮船維柳樹
春水汎桃花
廬阜依霄漢
江洲對渚沙
多情白司馬
文藻詠琵琶

泊江渚

艤棹蘆花渚江天夜向中月明銀色界波靜水晶宮進
止誠闕分升沈迥不同豈能終默默長嘯問穹窿

過采石有懷李白及過彭蠡有懷陶令

制作隆中古寥寥大雅音文章闕有道天地豈無心白
也才何逸時哉陸易沉蛾眉亭外月還照大江濤

其二

擾擾元熙事相將晉鼎移豫州歸宋日陶令棄官時嘉

遊非干譽高風不易追如何弔形迹長使後人疑

懷遠縣

治平今有日因得遠人懷一水牂牁遠千山翡翠開竹
祠依澗壑縣郭半雲靈我正詢民瘼苗碩莫浪猜

發桐江驛

早發梧江驛新晴宿雨收暖風寒食後啼鳥綠陰稠到
處停蘭棹逢人問象州隄防多鼠盜終夜整戈矛

謁羅池廟

嘗聞柳州柳今到柳州城謁廟雙旌去看碑百感生遠
人嚴祀典遺像著高名庭樹參天綠神來瘴癘清

遷江縣

駐馬遷江郭懸旌映落霞山危開八寨縣小只三家望
望依前戍鳴鳴起暮笳晚涼生廨宇中夜夢京華

告歸養

嶺海迎秋瘴霧披京畿清曉露華晞青宮恩重令終養
白髮心勞夢速歸柳葉雨晴鸚鵡語木綿風暖鷓鴣飛

眼中無限鄉關意含笑花前看錦衣

黃牛廟

丹扁玄書揭峻扃千章喬木雨餘青雲崖物像偏驚目
雪嶺春湍走建瓴常祀永頒昭代典扁舟多賴濟川靈
長懷馬耳徵奇夢我有深衷託薦馨

宜都一覽樓

層樓飛構壯宜都雲影天光入畫圖千里鶯花連隴蜀
一江風浪接荆吳煙霏山色時濃淡雨雜灘聲自有無

幾度憑欄倍惆悵白雲飛出寸心孤

紀夢

連旬風雨夢林泉
茆舍斜連竹樹邊
曉起分明向人說
幾時江上買歸船

張商英祠

依阿新法疏高銓
監稅荆南條左遷
為信生生出因果
東臯猶有施僧田

玉泉寺

青壁丹崖照錦霞
名山深處佛為家
高峯想與銀河近
好上秋風八月槎

呂蒙城

英雄分據國為三
吳蜀風雲入笑談
多病阿蒙終一捷
古城依舊向江南

附姚廣孝

法名道衍相州人有逃虛集

按姚少師或以為吳郡人
余觀王弇州筆記云少師
棲逸禪宗中嬰世網既參
佐命卒叛初服互逃儒釋

之間安獲進退之所其詩如入忉利天雖自快樂未
就解脫魔障既深終當墮落弇州此論因其力贊文
皇靖難之師而致貶也然少師實不葷酒婚娶似亦
堅守其師教矣詩則惡可廢諸

石經山并序

石經山在燕之范陽郡峯巒秀拔若天竺山故
稱曰小西天隋大業間有法師靜琬者處是山
思聖教有難不能流通于是發願募緣敦工鑿

石為板刊造一大藏經儲積於山以備其後法師
首刊至唐貞觀初僅成大涅槃一部而法師乃卒
其後子孫繩繩化億萬人乞錢粟刊造餘部歷遼
與金然後完此一大藏貯于巖洞者七地穴者二
洞以石門閉之穴以浮屠鎮之自隋唐遼金及元
碑碣森列照映巖野然而累經干戈無秋毫之犯
洪武二十一年歲在戊辰春正月廿一日余奉旨
往觀念法師之願力宏大堅固是山之泉石靈異

清秀故賦是詩鐫於華嚴堂之壁雖未足彰法師之幽光庶以紀茲行之歲月而託其不朽也

詩曰

峨峨石經山蓮峰吐金碧秀氣鍾懋題勝槩擬西域三墳五千卷華言百師譚琬公懼變滅鐵筆寫蒼石片片青瑤光字字太古色初非一代就用藉萬人力流傳鄙簡編堅固陋板刻深由地穴藏高從巖洞積初疑神鬼工迺著造化迹延洪勝汲塚防虞猶孔壁不畏野火燒

詎愁蘚苔蝕茲山既無盡是法寧有極如何大業間得
此至人出幽明獲爾利乾坤配其德大哉弘法心吾徒
可為則

自阜平縣過大派山二百里抵五臺游覽成詠
阜平從西來大山與連谷層岡歷千重一礪過百曲
銚露遠峰練色紆寒瀑虎迹屢驚人鳥道長仄足霞光
閃危嶠雲氣沍崇麓亂蟬咽陰吹幽禽響佳木斷徑鳴
孤猿平坡走羣鹿萬籊雜紅紫衆葉紛青綠木皮野客

衣石穴山岷屋遐方日尋勝空林暮投宿漫遊知自許
縱覽厭所欲會當登五臺清涼我心目

送友人之松江得曙字

潮來沙磧平月落海門曙汀蒲轉風葉堤柳搖煙絮江
頭春可憐天涯人獨去有歌送君行無酒留君住雪浪
沒沙鷗雲帆出江樹回首讀書聲青山不知處

送靈隱欽老

昔從冷泉遊今見冷泉主迢遞來石城袈裟帶松雨去

佳自無意何暇計出處官舍晚相看竹邊不知暑尚論
古人心還舉尊宿語歛爾返故廬惆悵獨延佇

蠡口夜歸

日沒渡口昏水風著人熱漁燈帶螢火微光互明滅舟
人報水程路遠行欲歇故山不分明目盡心力絕遙想
山中人待人仍待月

題怡上人松風閣圖

萬松蒼蒼蟠峻嶺久向耶溪誇絕境道人層構萬松間

宴坐長年樂深靜靈飈歛來巖谷口
髯君忽作蛟鼉吼喧飀直遣猿驚振迅
或令山鬼走須臾瑟瑟復蕭蕭初如笙
竽再如韶裂石聲欺匡阜瀑奔雷勢壓
錢塘潮清竒自適煙霞侶冷落豈宜箏
笛耳長夜寥寥四壁空贏得此心如止
水黃鶴山中淨名老援筆圖成過荆浩
金華太史製雄文秋色南山兩相好

且停寺

并引

寺在內丘縣西山中晉佛圖澄之所建也奇峯喬

林清泉修竹境致幽絕非他山可並昔號太子于
寺駐馬曰且停寺有碑在焉

老年落魄猶非昔破帽遮頭誰識得不問水郭與山村
杖藜到處尋陳迹西丘地勢一何壯建國當年誇石勒
竺師賴有佛圖澄問道從容降詞色至今禪刹遺礪阿
松扉晝掩紫煙蘿水流涓涓水樂奏山木黯黯山禽歌
樵人收豎不敢到竹逕雲斷惟僧過有碑千年字漫滅
忍使老眼空摩挲神僧去久山無主誰聽塔上風鈴語

古往今來一笑間不用悲歌淚如雨

天界寺

香刹依天極彤雲擁地維龍蟠新賜額龜負舊刊碑金
鐸鳴風殿珠幢影月墀遙瞻晨祝罷處處藹春熙

送友人之武林

我住城西寺君歸湖上山馬聲知驛路樹色認鄉關遠
戍霜鴻慘荒汀雪鷺閒自憐堤畔柳愁緒不禁攀

過礪東贈馬生

素抱厭塵緣林居自澹然鳥啼青磎曲樵唱暮鐘邊香
几流松雨書帷閤竹煙常時賓客至隨意煮山泉

訪道權上人宿城南

遠尋應不憚況爾祇同城一榻留人處孤燈照雨明藁
添新覓句琴變舊彈聲此夕諧歡笑元非徇俗情

題張山人適樂園林館

開牖依林樾迢迢去市遙翠低承雨竹綠碎受風蕉夕
嶺還侵戶春流欲斷橋主人緣愛客時為出山瓢

和徐一夔遊龍山雜賦二首

脩脩一禪宮樓臺隱金碧松關掩咽音花龕鎖雲迹羣
僧禮祖餘香燈自長夕

出崦不逢山長江波淼淼落日下遙汀寒雲翳沙鳥延
佇目難窮孤帆來樹杪

師林精舍遇盈師夜坐

空林長掩闌閒雲去無迹偶來值禪侶清談忘永夕坐
久磬聲沉松堂一燈寂

題觀音巖

高閣臨虛如履地長江萬里來無際
世人可到不可留只許禪僧全結制
亂帆來往逐雲飛隔岸淮山擁翠微
大士巖前常宴坐孤燈夜照客船歸

秋日登海虞致道觀

琳館無塵真福地門前萬竹自青青
丹成井底飛雙鶴檜老壇邊布七星
鶴舞出林朝每見龍吟歸壑夜還聽
我來祇為逃秋暑非是尋仙問道經

秋蝶

粉態凋殘抱恨長
此心應是怯淒涼
如何不管身憔悴
猶戀黃花雨後香

題聰上人山居圖

結樓曾向萬峯間
放鶴歸來錫已閒
夕景無多樵唱斷
疎鐘寒溜繞空山

附郭登詩

字元登武定侯英諸孫
也後積功封定襄伯

謁洞庭君廟

停舟一拜洞庭君古廟荒涼對夕曛鳥跡下庭書作字
蝸涎侵壁篆成文江通巴峽風濤壯山過寧陵楚蜀分
簫鼓不來鴉陣散滿階黃葉自紛紛

澧州道中遇雨

苦陰三月黯晴暉道遠心忙思欲飛山鳥莫啼泥滑滑
瘴煙纔起雨霏霏夜長古驛聞雞早日落荒林見客稀
困倚肩輿厭沾濕幸無塵土上征衣

岳侍講自謫所取回京


早登黃閣贊經綸欲報君恩敢愛身青海四年羈旅客
白頭雙淚倚門親鳴璫又喜趨仙仗補袞還思用舊臣
謾道歸來心便了天涯多少未歸人

哀征人

天連離水鳴咽戰馬無聲寶刀折冤鬼慘酸啼夜月
青燐熒熒明又滅照見征夫戰時血

客中春晚

遠塞書難寄空庭花自開舊巢雙燕子今歲又歸來



石倉歷代詩選卷三百二十二

欽定四庫全書

集部

石倉歷代詩選卷三百三十八至

詳校官庶吉士臣龍廷槐

侍讀臣孫球覆勘

總校官進士臣朱 鈐

校對官中書臣范來宗

謄錄監生臣黃 潔

欽定四庫全書

石倉歷代詩選卷三百三十三

明 曹學佺 編

明詩初集四十三

許繼

禱雨蓋蒼山龍湫時以邑宰命往

有秋望成稔中夏傷旱乾焚快勢日殷烈若火燎原良
宰念農力憫惻心靡安天澤苟弗霈歲功復何觀推誠

契神慮幽感通巫言風雲倏冥晦會使天瓢翻奉言謁
龍府萬疊凌雲闕所將慙匪德曷敢辭險艱仰彼庚桑
子惠茲畏壘山玄冥倘能格大穰行當還

夢友人

山河阻且長倏忽夢京師非闕仕途念良由親友思嵯
峨黃金殿晃朗白玉墀武衛儼森列文班盛逶迤鳳吹
逐天風飄飄彩雲飛故人喜相遇瞻望同此時歡笑若
平昔誰言有睽離覺來山欲夜念之情轉悲庭空霜月

冷修竹吹涼颼感此寒暑變嗟彼音問稀歲晚守窮巷
中心君詎知

四明山道中

山行入微逕險絕不自安始盤幽谷底復出層巒巔左
倚千仞壁右瞰萬丈淵石棧翳雲木洞壑號風泉飛流
從空下飄灑如雲煙下視不可極目眩心茫然仰茲名
山秀靈境高中天虛明日月戶上與列宿連便當攬八
荒恍惚候飛仙躋攀力雖倦曠望意乃宣夜寒山月白

聊宿于公禪

述懷寄脩德

昔遊登四明回望天台峯蒼茫見遠色積翠浮遙空維
時凝雪霽石窓曉玲瓏高寒心骨清炫耀目力窮八表
降雲氣萬里來天風想像瓊臺觀杳在丹霞中歸來願
遊覽及此春花紅真源隔迷途曠絕不可通煙蘿冷秋
月夜雨鳴梧桐夢寐發幽感徒嗟塵累蒙王子吹笙侶
高情諒誰同清言契夙心奮策得所從振衣石梁上思

躡飛仙蹤飄颻從遐觀不必升華嵩佳遊復我慙有懷
鬱忡忡猶憐雙飛鶴來候巖前松

客居

客居半畝園葱蒨連虛迴華池映危構光彩垂天影山
花開又落夏木變流景琴書含餘潤綠陰晝方永飄颻
清風來煥爛朱陽炳遙風際天末曠目時一騁玩物等
榮辱忘已齊喧靜閒將詠言適遠使塵累屏一為人事
感憂來豈殊境何如理荒畦相呼下煙嶺

述懷贈知己

驅車卽長道棹舟越廣川悠悠欲何適自謂將登天飄
颻廣莫風浩蕩滄溟煙下上九萬里瞬息心茫然遠遊
良未遂於焉暫周旋空山積春雨萊草生石田矯首望
天末倦翮思孤鶩

歲寒三友圖

孤標鬱深翠勁節挺寒綠復此雪後花娟娟瑩如玉風
霜慘陽林冰霰互陰谷枯悴紛相藉於茲見高躅貞心

諒已同盟好在幽獨轉念繁華姿中道何反覆

夏日竹間獨坐

徘徊叢竹間竹深氣彌清微風引天籟飄灑何泠泠天
高白日午景徹朱夏明密蔭爰可託靜念娛幽貞遙空
望層巘遠黛積深清時見孤雲來復與飛鳥并顧境已
遠世長嘯忽忘形惜無會心者共言千古情

秋夜

寒風吹疎林霜葉墜鳴雨懷思倦遙夜清夢了無與攬

衣起回惶人靜月在戶孤鴻亦念羣哀哀叫雲渚來者
方云至往者不可沮孰司索籥機一氣奔寒暑天運無
始終人世有今古

中夜聞風雨滿林明旦即為重九情之所至輒
見乎辭

夢覺清夜分林塘響風雨虛懷怯病枕展轉心自語重
陽適茲日興感春時序柔道方彙征嘉名固宜與嘹嘹
冥鴻翔撼撼涼葉委撫跡徒有悲抽思謾無緒登高候

明發新寒薄衡宇黃花滿山籬采采懷儔侶

立秋前作

雨止暑夕涼長河有秋意振衣風入谷顧影月滿地于
喁天籟虛凝靜池光媚清景晤深懷幽感已隨至平生
山澤謀終歲不一遂徒成守兔株安用屠龍技乾坤一
身渺日月百年駛長憐故山雲夜夜勞夢寐

雨望

蕭槭木葉聲慘淡山雲愁郊扉度清夏一雨驚涼秋節

炎望不見蒼莽非舊丘羈情信怏怏世事良悠悠行人
夕已稀耘者方未休煙深語儔侶草上驅羊牛菴鉅豈
不勞志願無外求所以沮溺徒不為堯舜憂歲功歎已
矣慨然懷綠疇

自雙溪將還家月夜有懷作

月圓當今夕客還候明旦天空影自流道遠情猶閒徘徊
清輝間喬木夏陰散涼亭螢暫歇陰沼蛙方亂匡牀
寢不寐病骨勞展轉青燈照愁心幽花為誰燦雞鳴起

促駕路出煙林畔半生羈旅蹤江山浩興歎

夜宿淨土寺

月上山牖白風來石牀冷山深氣如秋清景心獨領平生塵外意幸遇人事屏誰令墜迷途趨喧乃違靜猿鳴幽谷口鶴唳古松頂勝境難復留晨征度雲嶺

度銅巖嶺

鷗啼山月落旅枕鄉夢返迂途謝平臯首路指崇巘石門天梯峻逕逐蒼崖轉谷樹碧雲深澗花紅露泣徘徊

望故隱我行亦未遠風景豈不佳羈懷自難展

九日

高風驅俗塵霜日麗寒素以茲幽曠懷可使佳辰度黃
花已在手樽酒故人遇廣野接平岡復得閒余步天空
目自遠景豁心已悟興盡即言還寧悲九秋暮

山行憇林下人家

暫登山上岡復憇林下扉入林坐苔石黃葉飄人衣窮
秋野色改遙陰際寒暉悠悠嶺煙孤颺颺谷風悲情來

欲何語興盡自言歸帶索老忽逢因思榮啟期

對雨

沈沈時雨積冥漠晦平莽卧起人事閒臨軒坐虛敞繁
林滴餘潤曲池散清響去家徒有思出門亦何往山深
亂雲合村暝孤煙上飛鳥望不還空愁結遙想

題紈扇

霜筠託冰練好合兩無忤白月當太虛團光溢寒素中
心抱明潔恥受炎塵汙顧盼風自生時哉豈徒遇為歡

殊未極秋涼入庭樹

山齋雜詠

幽谷吐靈氣清明凝上浮遙升羣峯頂薄空藹悠悠映
日光且潔因風捲欲收無心自搖曳寓跡寧滯留怡我
靜者妙聊用忘餘憂

右白雲

碧霄靜風露纖翳久已滅清輝滿瑤臺素影流銀闕蒼
茫九萬里皓若冰玉潔天步夜迢迢但見疎星列高懷
自無欲對此方洞徹

右霽月

幽興何所極，遠有天際山。高空靜無滓，秋入層峯間。微風掃煙黛，薄雲籠曉鬟。黛鬟不足惜，何物乃相關。誰言是中意，使我心獨閒。右遠山

竹林王氏索題

神僧昔渡海，覆舟耀靈蹤。不隨滄溟去，化作青芙蓉。宿雲暝暖深，夜雨蒼翠重。搏桑炫初旭，輝耀在高峯。右覆

船曉日

亭亭霜雪幹，隱隱煙霞島。孤絕幽勢多，澄灣下相抱。暝

光澹將夕霽色浮初曉時有遼東禽飛來海天宵
右松嶼晴嵐

溪山明且秀美景如越中投竿屬清夜扁舟若乘空波
流澄素光絲綸颺微風絕勝寒江上急雪欺孤篷
右剡溪釣月

石磴緣蒼蒼負薪下層峭歌聲相應發山木閃殘照近
驚幽谷響遠答清猿嘯欵乃江上音煙波豈同調
右下嶺樵歌

夜宿期王修德不至

城西挂纖月夜色回春
逕出門候所思花露沾衣淨
悠悠醉餘意寂寂靜中聽
燈暗清漏初煩愁亂孤興

春郊送別圖

長郊夜來雨物意有春色
樹靄散晴暉川光汎空碧
深將一杯酒遠送千里客
佳景念睽離恨隨芳草積

楊隱者宅觀菊

謀拙生事微安取沽酒錢
佳辰恥虛爵黃花負秋妍
歛

襟倚涼風舉首望遠山真意固有在薄俗漫相憐

其二

淵明雖一仕苦節無與對環堵何蕭條聊作歸田計高情自天游縱浪塵物外懷古意徒深清風自千載

其三

百卉競春時誰言有秋菊淒然風霜候榮耀惟爾獨思將慰孤芳斗酒苦不足盈盈抱冲襟寒香滿書屋

夏日雜言

炎暑寡出入幽室常懷人清風天外來澹然成主賓忘
言自諧意獨卧聊任真誰謂羲皇世乃屬耖桑民

又

濯濯思去垢不必江海流君看一勺泉淨涵千頃秋炎
風塵滿道胡乃從遠遊歸將散余髮笑卧雲林幽

曉起

曙扉豁清望華屋沒雲間矐矐東方明漸見林外山人
喧已擾擾鳥聲亦開闕白日上青天龍御不可攀徒言

暮能旦流景為誰還

水碓

臨湍設機械雲母終日春不勞致精鑿無乃貪天功流
駛響逾急灑灑水面風村莊縱可隱誰復棲梁鴻

病中有懷

微風散時雨朱明氣猶淑林塘含餘清密陰凝衆綠幽
人望不見白雲護深谷何以舒病懷看書不成讀

自遣

卧疴人事違流景自如昔年年溪南村霜葉千樹赤既
為昇平民所好胡不得耕鑿給妻孥相看至頭白

晝寢

清夜常少眠病來晝亦寢詩書委塵篋事業付衾枕窓
明耿秋暉風氣覺先凜徒憐佳節來黃花勸人飲

雪

山花寒不開庭雪曉還積江南十日春東風未相識蕭
條新柳姿清淺故池色日晏啓荆扉迢迢遲來客

賦蛛網落葉

秋氣感木葉故林飄墜時不成棲蔓草還復綴蛛絲屢舞涼風得高懸落照宜多情似留戀可奈已辭枝

送別

寒日照荒野驚風號遠林蕭條暮秋節眷戀故人心雲起望馬首天清聞雁音更堪明月夜夢斷北城砧

田中作

野水靜涵碧暗涼生夕波耘夫出畦畛浴鳥上菱荷汎

汎青苗澗依依綠樹多遙知沮溺意無奈問津何

客中移居

一室遷居數溪山客思中琴書經曉露門巷入秋風解
榻非徐穉開樽有孔融相携看劍氣貫斗夜如虹

十七夜月

玉鑑重飛夜寒光落素扉山河空照影星漢久沉輝城
鼓催傳漏庭砧罷搗衣誰能清嘯裏長望不懷歸

自遣

獨坐還長眺高歌祇自聽雨中苗盡綠煙外樹重青病
久憐形瘦愁多畏酒醒芙蓉將爛熳采采憶江汀

述夢

宇宙人間世煙霞物外情神遊謝氛垢仙夢繞空明天
影滄溟濶雲光太華清時逢王子晉鶴上坐吹笙

除夜

風雪送殘臘春生除夜深往來寧少間消長自相尋無
術遣貧病有懷觀古今燈前兒女樂應未識予心

看梨花

玉顏吐香清夢回靜思相看渾欲迷夕寒初消夜月淡
暖風不起春雲低園亭寂寞謾無語桃李紛紜徒滿蹊
芳華轉眼易銷歇洗粧誰為酒重攜

七月十四夜作

山堂起坐攬秋衣窻竹脩脩月在扉音問每時煩故舊
夢魂終夜繞庭闌露華憶偏仙人掌蟲韻驚催織女機
感物悵然懷往事到今三十一年非

題翠竹

鳴鳳去不返湘江春自流
鷓鴣煙雨暮翠袖不勝愁

蘭菊圖

九畹曾無舊日春都隨蕭艾混
泥塵秋風冷淡山籬下
惟有黃花是故人

寄廣信二釋子

清泉山下白雲飛幾度行吟歎
石扉每憶夜涼供話語
月明松露滴秋衣

懷歸

東風漠漠柳絲斜
啼鳥聲聲隔絳霞
人散客窗春色靜
獨將離思看飛花

病中雜言

忙裏身心病裏閒
高眠長日對青山
天邊飛雁將秋色
遠在微茫落照間

附林弼詩

字元凱福建龍溪人有登州集

題周伯虎採蘭詩卷

光風泛崇蘭，瑤芳散中林。草木被餘薰，山水發清音。蕭
艾一何繁，霜露日已深。伊誰愛芳質，於焉間冲襟。獨有
君子人，皦皦同貞心。采之未盈掬，價重雙南金。逝將紉
華佩，遠鄙瓊與琛。重將鼓遺操，邈繼南風琴。淳風未云
喪，振古猶斯今。

旅感

驅車秣吾馬，萬里涉遠道。遠道多險艱，行子何草草。晨
征夕未息，川陸漫浩浩。行役豺虎區，此身不自保。明當

脫塵羈優游以終老

題王佐山人畫

山光雜空翠雲影淡晴暉
古渡舟誰繫虛齋人未歸
石苔秋雨積野樹晚風微
便欲拋塵事垂綸柳外磯

題王廷珪畫

秋色晴山迥煙光野水連
空林輞川外古樹草堂前
天地留詩卷江湖老釣船
美人隔雲漢對此思悠然

題秦皇廟

往事悠悠逐海波荒祠寂寂寄巖阿三神山下仙舟遠
萬里城邊戰骨多東魯尚存周禮樂西秦空壯漢山河
早知一世能移祚崖石書功不用磨

送林鍊師歸武夷

三山樓觀倚雲開九曲溪山入夢來半夜丹光照林壑
常時劍氣動風雷幔亭峰頂霞杯進石鼓灘前月棹迴
吹徹玉簫空想憶故人今在鳳凰臺

送郭誠校官

武安邑小武城如三載人賢郭校書有酒齋郎能放鶴
得錢溪女或留魚沙場落日鴉飛急海國秋風雁過疎
南士祇今多獎用君行努力莫躊躇

西村隱居為饒城羅時用題

西村竹樹淨朝暉萬事閒來總息機一夜小溪春雨過
半篙新水白鷗飛草堂築就肯誰寄彭澤歸來願未違
最憶衡門凝望處平疇十里豆花肥

臨江

柳外樓臺入翠微
水邊簫鼓蕩晴暉
樟江雨漲魚新上
皂閣雲生鶴共飛
諸老尚留詩卷在
此身未逐釣船歸
篷牕吟罷還成醉
蜜酒初香玉笋肥

送宋衡還金華

名璉景源
學士之子

江花飛雪送殘年
客思隨雲度遠天
朱雀航頭膠凍草
金華洞腹貯蒼煙
明經已踵章賢後
對策應推賈誼先
無限故山松竹好
平安為報玉堂仙

次韻契都盟郡中翫月

見月令人寫百憂
况逢良夜值中秋
星河有路通蟾闕
玉海無波湧蜃樓
老桂一枝容手折
仙槎萬里漫神遊
清光莫照干戈地
憂國詩人易白頭

覺初上人還永嘉江心寺

江心古寺金焦如
滄波湧出青芙蓉
千歲鶴歸作人語
九淵龍起聽梵書
山屐重尋謝康樂
丹砂試問陶隱居
自是初心得真覺
閒身去去隨樵漁

題方壺子墨竹

方壺仙子御風還雲外珊珊響珮環吹徹鳳笙山月冷
參差玉管落人間

韶石

一曲南薰奏石隈餘音猶繞九成臺青山空灑懷人淚
雲暗蒼梧鳳不來

聽雨軒圖為王彥舉題

山窗酒醒夢魂清竹外松邊點點鳴蒲礪寺前千尺瀑
都隨黃葉作秋聲

畫紅梅為吳允思題

冰姿雪色自無塵
香艷桃嬌偶借春
一段繁華幽寂意
題詩試問隴頭人

題安南陳內相雜畫二首

白石青蒲春水生
夕陽毛羽照沙明
戲拈畫筆知何處
柳外池塘艇子輕

隴頭春樹拂雲紅
學語聲嬌弄晚風
上國祇今辭遠貢
漫愁雙翮閉雕籠

題黎省之唐馬

嗅地低回欲滾塵玄雲散彩五花新
蹴水不識交河道
芻豆相從愧圉人

右林登州初名唐臣後更名弼自號梅雪道人生于
閩之龍溪元至正中進士仕為郡幕國初聘起預修
元史擢考功司主事使安南却其餽贖朝廷嘉之尋
命知豐城有善政轉判饒州既而謫戍未幾復留禮
部知登州卒此集乃大司徒馬鍾陽公所遺鍾陽意

重閩之文獻故采而刻之隆慶己巳錫山俞憲跋

石倉歷代詩選卷三百二十三